



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,
*manè discutienda in Scholis Medicorum, die Martis vigesimo-tertio
mensis Decembris, Anno Domini M. DCC. XLIX.*

M. ANTONIO FERREIN, Professore Regio &
Regiæ Scientiarum Academiæ Socio, Doctore
Medico, Præsidente.

An à Naturâ varius quàm ab Arte Speranda Crisis?

I.



ON una est ratio quâ morbi in salutem terminari solent. Si viribus vitæ sensim mutetur, aut abigatur quod functiones oppreserat, solutio morbi contingit; hanc nulla præceps humorum vacuatio comitatur. Si factò impetu, natura morbi causam amoveat, aut amovere conetur, Crisis dicitur, seu iudicium, quo scilicet ortum, naturam inter & morbum, certamen dirimitur. Duplex autem Crisis, fausta & infausta, illa verò perfecta, vel imperfecta. A priori

A

2
ægotantis salus absque recidivæ periculo, à posteriori levamen. Utraque per evacuationem, aut metastasim. Prioris generis Crises tot fieri possunt, quot sunt corporis emunctoria, humoresque diversi. Vel enim ex primis viis fursum deorsumve ejiciuntur naturæ molesta, vomitu, Diarrhœa, &c. vel apertis, quibus coercetur vasis, ex ore, naribus, recto, aut mulierum genitalibus prolilit purpureus latex; vel ex sanguinis sinu variè secedunt humores, perque diversas quas ipsis paravit natura vias, criticè eliminantur.

Metastasis critica habenda quâ morbi fomes alicubi decumbit in ægotantis levamen. Inflammatoria est, vel non. Illius exemplum variolæ, morbilli, parotides, bubones, &c. præbent; hujus, surditas febri superveniens. In his omnibus naturæ moliminibus enodandis noli ad astrorum influxum, aut varia Archæorum nomina confugere. Habemus scilicet in hac divinâ humani corporis machinâ motûs leges quibus hæc omnia regantur, harum vis naturæ nomine ut in statu sano concoquit, superfluosque eliminat humores, sic in morbofo acres noxiosque ejicit, aut contemperat. At sæpè sæpius his obruta natura vix salutares exeret effectus, nisi tempestivè subveniat efficacior medicina quæ Crises promoveat, aut *faciat*, non verò expectet; hinc tutior, certior, atque jucundior curatio.

I I.

CUM stupendam illam in morbis profligandis naturæ velut sollicitudinem observassent veteres, divinum quid operi subesse facile sibi persuaserunt. Nec immerito si leges motus à Deo primariò institutas intellexissent, non enim alia à Cælo delabitur actio; nimirum ea est partium, & functionum nostrarum concordia, quâ sibi mutuò subserviant, & altera alteri invigilet, non aliundè quàm à nervorum, vasorum, &c. nexu, consensu repetenda. Quod in statu sano unicuique obvium est, in morbofo forsân luculentius adhuc elucescit. Agitata in faucibus plumula, vel ibidem pertinaciùs defixa pituita vomitum ciet, cui perscindienda plura sociatis viribus concurrunt organa. Acro intestinis hærens Diarrhœam nervos vellicando inducit; at si vel copiosior sanguis, vel motu raptus effero vasorum latera, nimia pressione disrumpat, fractis repagulis exsiliet, partesque vicinas mole priùs obrutas levabit. Sudores pariter prorumpent, si quæ morbi causa dicenda erat materies, per vim viæ ad corporis ambitum pellatur, ita tamen subacta cutisque poris accommodata, ut eos facile permeare possit. Quod de sudore, idem de urinâ, aliisque humoribus excrementitiis dicimus. Ut verò intra sanguinem priùs delitescens foris ejiciatur humor, duo requiruntur. Laxentur vasa, ac humor ipse tenuior evadat. Posterius vividiori motu, febre etiam vigente peragitur, prius verò remittente febre, & pacato motu. Hinc est quòd circâ decrementum aut finem acutorum Crises antiqui expectaverint. Patet pariter causam universalem Crisium assignari non posse, sed cuicunque suam competere. Demùm etiam intelligitur generalibus Crisium signis vix esse fidem adhibendam, sed ea tantùm agnoscenda quæ cuicunque peculiariter certam ac definitam Criseos speciem denuntiant.

I I I.

HÆC operantis Naturæ molimina observare, Crisique si tutò, citò & jucundè curet, favere apprime convenit, at rarè illæ aves; plerumquè irriti sunt naturæ conatus, sæpiùs vanum tantùm aut insufficiens ejus opus; sæpè etiam in eo succumbit; Crisim quoque futuram bonam aut malam, perfectam aut imperfectam prædicere, præclarum hercè, at arduum opus, & in praxi etiam versatissimis rarò concessum; nulla enim nec in toto morbi decursu, nec in ipsâ coctione generalia elucescunt signa quæ crisim manifestò prodant. An

tibi fidendum videtur ingenti illi dierum criticorum, indicantium, intercalarium, vacuum catervæ, quos internoscere vetat, vel ipsa authorum hos celebrantium disceptatio. Præterea si dierum contemplationi fidas, nec ipsum primum morbi incipientis diem accuratè dignoscere poteris; nam incerta sunt quæ circa eum statuerunt veteres; alii enim à decubitu auspicari volunt, alii à primo febris insultu, alii denique à primo morbi ingressu. Interea otiosus afflidebis ægrotantis lecto, nec nisi die vacuo Pharmacum audebis porrigere, & quem non terrebunt symptomata, dies terrore suspensum morabitur. Verùm si perfecta forsàn morbum solvat crisis, saltèm moræ pretium habebis repensum. Contrà si mala, aut imperfecta tantùm, ut fieri allolet, frustrà naturam incusabis, te solum redarguent adstantes. Si adhuc affulgeat aliqua vitæ spes, altera denuò expectanda dierum recurrentium periodus, ut quod 14^o. die non perfecit, 17^o. tandem peragere fatagat, aut 21^o. elanguescens natura. Fateantur interea vires, & quò longior morbus, eò protrahuntur insigniùs dierum criticorum intervalla. Serpit interim malum, & in debile grassatur corpus, ut quem primis efficacior medicina diebus restituere potuisset, eà agentis naturæ contemplatione otiosus, quâdam mortis quasi meditatione mactetur. Nec mirum, ex 20 enim 14 spectando, sex tantum curando trahuntur dies; hinc morbi qui à nobis periculosi judicantur, ab illis lethales spectantur, quia per eorum decursum remedia nonnisi parva adhibere ausi sunt.

I V.

IPSAM porrò antiquorum praxim consule; sanior illa circa duos morborum status tota versatur; cruditatem scilicet humorum eorumque coctionem. Crudus dicitur humor qui à naturali quantitate, qualitate, vel motu recedit; coctus è contrà qui per actiones vitæ, propriam indolem, vel congruam curationem, novam passus est mutationem. Signa coctionis memorantur, morbi quies, imminutio, virium constantia, incrementum. Symptomatum levamen, vel sedatio, cum vitæ robore. Denique humorum ægri, cum ejusdem sani humoribus similitudo; verùm hæc morbi potiùs cessationem exhibent. Ad quid ergò Crisis quam coctioni succedere sperant?

Præterea vel prævideri potest Crisis, vel nullo certo præcognita symptomate Medicum stupore afficit nil tale cogitantem; alvi fluxus saburram excipit, hæmorrhagia, plethoræ & mensruis suppressis sæpè succedit, sicque Crisim. quandoque ex præcognitis causis licet conjicere. Sed quænam symptomata hanc certò prænuntiant? Quænam futuram metastasim indicant? Nulla certè, nisi quæ summè fallacia. Prævisam Crisim salutaribus antevertere remediis sæpè conceditur. Improvisam fovere, cum sæpius humor lateat incognitus, id solummodò concessum. Ut igitur certa habeatur regula, quâ in iis vel negligendis, vel contrà sedulò fovendis utamur, id priùs perpensum esse debet, an ars naturæ efficacior, quod natura molitur, possit peragere, sic sæpè per venæ-sectionem Galeno vel ipsomet monente plethoram tollere possumus, quam operosè natu ra per hæmorrhagiam expulserit. Ut sæpè vomitu Sydenhamius diarrhæas quas saburra stomachalis febribus induxerat, omninò non persanavit tantùm, sed & prævertit. Deindè id etiam exploratum esse debet, an ab arte promoveri possit Crisis, cum scilicet illa certiùs, tutiùs atque jucundius hanc soleat interterre. Quæcunque enim Crisim Medico expectanda sit, ei suppetunt instrumenta quibus faciliè, tutò, & certò eam procreare valeat. An ventris fluxum à naturâ speras? Enema, Catharism jube. An vomitum? Emericum porrige. An Diuresim? Largum Pitannæ potum præscribe. An sudores? Adfunt Cardiaca, & alia quibus eliciantur mille, Sunt demùm casus in quibus vix auxiliatrices.

naturæ manus ars porrigere potest, vel ejus operationes prævertere. Tunc ergo ferè otari Medico contingit, nec aliquid moliri permittitur. Id autem accidit, 1^o. quando ex improviso, & bonis avibus opus jam incepit natura & medio tuta incedit, 2^o. Quando à Crisi naturali plus boni sperandum, qualis est hæmorrhagia narium dolente capite, mulierum menses, hæmorrhoides in affluetis. 3^o. Demum in iis quibus parum, aut nihil conferunt artis instrumenta, quales sunt omnes ferè per metastasim Crises, & hinc hujusmodi morborum præ aliis periculum majus. Hos si excipias numero paucos, arte tuâ facilius, tutius, certiusque dictos obtinebis effectus.

V.

FRUSTRA de morborum causis nostram incusabis ignorantiam, ita ut nihil nobis superfit præter naturæ servitium, & Medicis id decoris relinqui dices ut sese naturæ Ministros jactent. Quæcumque sint morborum causæ, id Medico incumbit, ut quæ adsunt in corpore præter naturam mutationes, contrariâ mutatione persanet, & de remotioribus causis parum sollicitus, proximam, præsentem eamque satis obviam tollat. Neque legum Artis gnarum indicationes fugiunt, certa sunt ac definita vitia simpliciora, è quibus tota ferè exurgit morborum cohors; certæ sunt ac definitæ, quibus tota innititur Medicina, indicationes. His absque erroris metu firmiter adhæreat Medicus, nec aliam nobis methodum stravere vel antiquissimi Medicinæ principes. Quantumvis enim doctrinam de Crisibus summopere exornaverint Hippocrates & Galenus, ipsisque summam tribuisse videantur attentionem, si tamen ipsorum circa praxim statuta methodosque in sanandis acutis adhibitas consulueris, hanc doctrinam prædicare potius quam sequi videntur. Sic in acutis affectibus ad animi usque deliquium posthabitis Crisibus venæ sectionem imperabant, sic peplion, helleborum aliaque violenta pharmaca præscribebant, ut in libro de victu acutorum apud Hippocratem videre est. Sic passim in aphorismis, catharsim non quæ doctrinæ Crisium respondeat, sed solis indicationibus congruat, propinari jubet. Hæc methodo nulla certior, tutior nulla, nulla jucundior, nec quæ vulgatori feliciorque praxi sit accommodata magis.

Ergo à Naturâ rarius quam ab Arte speranda Crisi.

DOMINI DOCTORES DISPUTATURI.

*M. Dionysius - Claudius
Doulcet.*

*M. Antonius Petit, in
Matronarum gratiam
Anatomes, & Artis
Obstetriciæ Professor.*

M. Joannes de Dieß.

*M. Bartholomæus - Tuffanus
le Clerc, Medicus Regis
ordinarius.*

*M. Stephanus Pourfour
du Petit.*

*M. Josephus de Jussieu;
Regiæ Scientiarum
Academia Socius.*

*M. Ludovicus - Gabriel
Dupré.*

M. Paschasius Borie.

*M. Henricus - Franciscus
Bourdalin, Scholarum
Professor.*

Proponebat Parisiis **AMBROSIUS HOSTY**, Hybernus, Doctor Medicus Remensis, Legationis Anglicanæ Medicus ordinarius, necnon Saluberrimæ Facultatis Medicinæ Parisiensis Baccalaureus, A. R. S. H. 1749, à sextâ ad meridiem.